

東

華

錄

東華錄

康熙二十五

臣王先謙敬編

臣周瀚蕃恭校

康熙十九年庚申春正月甲午勇略將軍陝西提督趙良棟奏臣率兵從白水壩浮水渡江擊賊大敗之追至青川石峽溝復敗其伏兵龍安府僞總兵姜應熊等降遂復龍安府得旨嘉獎下部議敘○丙申諭奉命大將軍康親王傑書王所奏據實指參事已經覽悉朕思凡行一事必前後計慮果有裨於國家始可舉行若輕率妄動必致舛錯今廣西湖南漢中興安等處俱已底定逆賊餘黨引領以冀歸正者不止百千若將耿精忠卽行正法不但已經投誠之人以爲後日亦必如此聲明其罪卽未經投誠之人睹此寒心亦未可知關繫實重前朕手諭欲令耿精忠來京者蓋撤回

福建一半滿兵之意非欲卽行處決俾其先來也如王善能勸諭令至京師諸事皆得平安王但加意開導之不可輕舉彼如必不赴京再行詳悉密奏候旨○壬寅勇略將軍陝西提督趙良棟奏招撫僞知州蔡廓僞副將郝俊龍等七員僞遊擊知州知縣等官五十七員兵丁三千三百餘名又生擒賊兵二百六十七名下部議敘○甲辰勇略將軍陝西提督趙良棟奏僞總兵潘九蘭僞知州田大有等三百一十六員投誠下部議敘○乙巳奮威將軍平涼提督王進寶奏康熙十八年十二月二十七日臣率官兵至神宣驛間朝天關有賊踞守臣卽飭令官兵奮勇撲剿過關二十九日馳至廣元縣分途追擊擒斬賊兵無算恢復縣城得旨嘉獎下部議敘○丁未諭議政王大臣等將軍趙良棟攻克白水壩青川招撫龍安成都指日可復將軍王進寶亦分兵三路於正月初旬

近偏保甯逆賊王屏藩等困迫必各潰遁其移檄嚴飭楊茂勳徐治都等乘機急取重慶夔州勦禦逆賊如遲延觀望誤此事機嚴治其罪○招義將軍伯馬承廕標兵以餉置鼓譟大將軍簡親王喇布卽撥餉給發兵遂甯戢理事官麻勒吉等奏馬承廕黃明葉秉忠在賊中俱係僞將軍今同來歸誠馬承廕授爲將軍伯而黃明葉秉忠未授職銜致兵眾肆行葉秉忠已年老乞休無復異志惟黃明强悍爲柳州官兵所懾服若不調用他所恐終爲患上

諭授黃明爲援勦總兵官率馬承廕標兵一千赴將軍莽依圖軍前隨大兵進勦雲貴葉秉忠授總兵官職銜許其休致○庚戌先是命昭義將軍伯馬承廕設立五營會勦雲貴至是揚威大將軍簡親王喇布奏五營兵少應增援勦二營共爲七營營各一千人上諭凡將軍標下無設七營之例馬承廕所屬官兵黃明率二

千隨征雲貴外廣西省城甚重其更撥一千赴大將軍簡親王軍
前馬承廕標下仍立五營兵五千參將守備各官聽馬承廕選擇
具奏○辛亥以庫勒納爲翰林院掌院學士由詹事遷○以安親王岳
樂班師抵武昌遣使臣慰勞賜橐駝良馬○諭九卿等科道官內
升外轉原以示勸懲也今見才優者猶知憚於外轉其或才力不
足不稱言職之人安於外轉道員者甚多是但以示勸非所以示
懲也故令九卿詹事科道會議務期得當魏象樞等奏稱恐天下
不肖之輩不識朝廷慎重道員之意疑爲厭薄言路之端等語邇
年以來姚文然李之芳施維翰等內升未久卽任以大僚督撫亦
因其克盡言職才能素著之故也此無論天下智愚不肖當亦知
朝廷無厭薄言路之意矣其外轉者或係素無建白或係昧於事
理或係任臆妄言或係才力不及原非因其條奏而外轉也又稱

近年外轉之科道並無貪污溺職之一人而五部郎中俸深升道如范永茂高恆豫盧元培程汝濮等賊私累累劣蹟彰彰不知凡幾等語科道外轉者豈並無溺職之一人乎五部俸深升道員者甚多豈盡係貪劣之人乎如陳丹赤等優者匿而不言獨舉范永茂等四人不辨賢否而概言之可乎魏象樞去歲七月內曾於朕前面奏科道官所行皆係徇私有負朝廷耳目之任罪皆應死今甫數月復言外轉者並無溺職之一人前後參差何其速耶爾等所奏理不宜批答因疏語內有以存國體之語故令諸臣知之至若外轉科道以小品官員用遂至有傷國體朕殊不解故特諭諸臣示以朕意○壬子 上幸鞏華城道經西山之麓遣內大臣致奠昭勳公圖賴○贈故翰林院掌院學士兼禮部侍郎沙喇里禮部尙書予祭諡文敏○癸丑調杭愛爲四川巡撫由陝西調○乙卯

上回宮○勇略將軍陝西提督趙良棟奏臣率官兵自龍安進
勦追至舊州明月江賊斷橋守江臣督兵浮水渡江擊賊令總兵
官王進才等分兩路直取成都而親率大兵繼進至綿竹僞勁武
將軍汪文元迎降本月十一日至成都二十里鋪僞巡撫張文德
等率文武僞官二百餘人迎降遂復成都得旨嘉獎下部議敘○
奮威將軍平涼提督王進寶奏臣等旣復朝天關廣元縣遂分三
路趨保甯去城二十里據孔道而軍是月十三日賊二萬餘來犯
臣分遣官兵大敗之追勦至錦屏山破賊四壘賊退保橋我兵又
擊之奪橋斬關入城賊渠王屏藩僞將軍陳君極自經死生擒僞
將軍吳之茂張起龍僞總兵郭天春等十七員遂復保甯得旨嘉
獎下部議敘○戊午以趙良棟爲雲南貴州總督加兵部尙書銜
仍兼管勇略將軍事務○己未奮威將軍平涼提督王進寶奏原

任關南道胡昇猷被難數載未受僞職請令四川督撫酌量另用上諭胡昇猷人品甚優身陷賊中數年百計偏辱守節不屈可嘉川省見在用兵應卽於其地要缺補用

二月辛酉朔諭議政王大臣等今成都保甯皆已恢復宜乘此機會速定雲貴四川旣平湖廣已屬內地其令順承郡王勒爾錦貝子準達都統范達禮等盡率所部兵沂江而上規取重慶順承郡王等卽於重慶駐守將軍吳丹鄂克濟哈與趙良棟等同進取雲貴吳丹鄂克濟哈於順承郡王軍中簡精銳馬兵將之前行總督楊茂勳提督王之鼎駐守成都王進寶駐守四川徐治都還軍守彝陵荊州諸處○命總督楊茂勳等赴四川招撫流亡○廣西巡撫金鵠奏海賊謝昌李積鳳等不時侵掠沿海地方請調平南王藩下都統王國棟等前往勦禦得旨都統王國棟等身在省會不

宜縱賊彼猖著同副都統尙之璋總兵官甯天祚等率藩下舟師速圖勦禦賊退之後更有侵犯內地者卽與巡撫金僞會商撲滅○奮威將軍平涼提督王進寶奏右路總兵官楊宗道等於正月初四日率兵進取昭化縣大敗賊眾恢復縣城隨於初六日率兵至劍州僞彭總兵等望風逃竄我兵入城初八日蒼溪縣僞知縣王璋等獻城降得旨嘉獎下部議敘○叛將祖澤清及其子良梗械送至京命俱凌遲處死諸子家口籍沒入官○甲子以鄂愷爲陝西巡撫由甘肅布政使遷○乙丑 皇子允祚生○丙寅奮威將軍平

涼提督王進寶奏臣與將軍吳丹遣鎮守西安將軍佛尼勒總兵官王朝海等率兵取順慶我兵前進沿途招撫鹽亭潼川中江南部諸州縣悉下之正月十八日抵順慶僞知府彭天壽等率眾降於是蓬州廣安州合州西充岳池營山渠縣隣水儀隴遂甯蓬溪

諸州縣相繼悉定得旨嘉獎下部議敘○丁卯諭戶部前因各省地方多有饑饉已經遣官賑濟今見京師附近之地四方饑民流移在道朕心深爲憫惻若不急行安插令其得所將來必至鬻賣子女難以生全作何設法令其各歸原籍著該地方官加意撫綏安集復業以免流離九卿詹事科道詳悉具奏○諭議政王大臣等成都保甯順慶諸府今已恢復四川底定湖廣大兵今正分道進定雲貴其廣西滿洲綠旗大兵休息日久亦當乘機速進大將軍簡親王畱每佐領兵一人於桂林其餘官兵王盡帥之往屯柳州大將軍平南王可駐守貴縣將軍莽依圖馬承廕都統馬九玉總督金光祖等可各率所部官兵並酌調平南王藩下官兵分道進取雲貴○己巳 上幸南苑行圍○直隸巡撫金世德以病乞休允之○以胡昇猷爲四川按察使原任闕南道○乙亥以于成龍爲

直隸巡撫

由福建布政使遷

○吏部遵旨議覆內閣學士兼修明史徐元

文奏纂修明史宜舉遺獻請將揚州府前明科臣李清紹興府名

儒黃宗義延致來京如果老病不能就道令該有司就家錄所著

書送館並監生姜宸英貢生萬言應速行文該督撫移送其候補

主事汪懋麟丁憂服滿到部應以原銜食俸入館修史原任副使

道曹格布衣黃虞稷見在丁憂俟服闋後咨送到館告成日一併

甄敘從之○命五城賣粥賑濟流移饑民於常例外再限兩月○

湖廣提督徐治都奏臣會同川督楊茂勳於正月二十一日進剿

川賊楊來嘉四路進兵大敗賊眾陣斬三千餘級生擒偽將軍王

鳳岐等復巫山縣於二十七日進取夔州得旨嘉獎下部議敘○

丙子大閱於南苑是日還宮○戊寅湖廣提督徐治都奏臣統大

兵抵巫山偽將軍楊來嘉等擁眾拒守我兵擊敗之乘勝長驅是

月初一日至夔州僞將軍劉之術率僞總兵翟洪陞等出降遂復其城得旨嘉獎下部議敘又奏譚宏遣子僞左路將軍譚天秘齎辨明脅從奏並繳到僞敕印牌劄官兵數目文冊本月十三日譚宏率子姪僞總兵譚地晉譚地升等詣軍門降下部議敘○庚辰以雅思哈爲甘肅布政使○四川總督楊茂勳奏臣於正月三十日遣兵進取大昌大甯二縣擊敗賊眾克復城池得旨嘉獎下部議敘○辛巳以四川平定裁郎陽撫治缺○壬午 上御弘德殿講官進講畢 上諭曰人品辨別止在心術公私凡人口之所言與身之所行往往不相符合故去私最難也○癸未先是命福建總督巡撫提督酌定進剿海寇機宜巡撫吳興祚奏臣詢之習知賊中情形者云賊踪雖多不如我新造鳥船堅固便捷今鄭錦悉調舟艦皆在海壇齊集宜乘風汎甚利將士方銳先攻取海壇破

賊藩籬則廈門金門俱可乘勝而下臣已與提臣萬正色決策萬正色以水師直攻海壇臣率標兵赴同安同督臣姚啟聖提臣楊捷調陸路兵規取廈門萬正色亦奏荷蘭國船遲速莫必轉盼三四月間南風一作我舟師卽難前進今新舊大小船隻俱集定海大洋撫臣吳興祚前來閱視知其可用臣已決計進討吳興祚率標兵馳赴同安爲臣聲援督臣姚啟聖提臣楊捷調陸路兵據圍頭以遏賊出入臣定於二月初四日進取海壇至是萬正色奏臣統率官兵由定海進發於本月初六日抵海壇賊乘舟逆戰臣分前鋒兵爲六隊直衝而入親統巨艦繼之又以輕舟繞出其左右併力夾攻礮火齊發擊沈賊船十六艘溺水死者三千餘人餘賊潰遁我舟師遂駐泊於海壇上諭巡撫吳興祚提督萬正色灼見賊勢乘機進剿已經克復海壇將軍賴塔總督姚啟聖提督楊

捷其會商分撥滿洲綠旗水陸官兵以策應進剿之師○甲申

上如鞏華城○乙酉 孝昭皇后忌辰行再期致祭禮 上還

宮○丙戌遣郎中明額禮賑宣府○是月賑湖廣武昌等府免陝西吳堡湖廣安化等二十六州縣去年旱災額賦

三月辛卯建威將軍吳丹奏二月十六日大兵至重慶僞文武官

出城迎降於是達州東鄉太平新甯南江安岳等州縣悉定僞將

軍楊來嘉彭時亨僞總兵江有倉等亦各遣人詣軍門繳印歸誠

得旨嘉獎下部議敘○壬辰以佟康年爲福建布政使由湖北按察使遷

○乙未以伊開爲雲南巡撫由大理寺卿遷○平南王尙之信下護衛張

永祥張士選赴京首告尙之信謀叛事 上命刑部侍郎宜昌阿

郎中宋俄託等以巡視海疆赴廣東察其狀諭之曰爾等攜帶張

永祥張士選以往密詢都統王國棟副都統尙之璋若事有實蹟

王國棟等自任能執尚之信卽一面奏聞一面赴潮州頃尚之信具奏自請撤還省會爾等抵廣東日詳察情形如應撤還卽具疏言省會不可無尚之信彼時當獨調之還爾等臨事之時無多株連儻有意外聽酌便行事是日宜昌阿等啟行○丁酉大將軍安親王岳樂凱旋上率王大臣郊勞是日駐蹕盧溝橋○以顏敏爲廣東布政使原任陝西布政使黃元驥爲廣西按察使由江西驛鹽道遷○戊戌上還宮○辛丑揚威大將軍簡親王喇布奏臣親率兵往柳州二月二十八日至永福縣聞馬承應反給傳宏烈登舟遣兵襲破其營臣等卽欲進剿因滿兵力薄又念省城至重公議暫還桂林得旨覽奏馬承應復叛今湖廣綠旗兵已取楓木嶺武岡州滿漢兵甚多廣西去武岡爲近宜調貝子章泰軍中滿兵每佐領六人綠旗精兵二千人令都統夸札帥之速赴簡親王軍前與平南

王等協力勦賊夸札至廣西卽令參贊軍事○癸卯福建水師提督萬正色奏我師既攻復海壇逆賊朱天貴遁據南日湄州等嶼臣咨會撫臣吳興祚陸路聲援臣親率水師於二月十四日自海壇進勦逆賊南遁我師尾至平海嶼與撫臣會師朱天貴復合僞將軍林陞駕舩三百餘隻踞崇武嶼臣於二十日乘風自平海南下賊率舩迎戰臣揮兵掩擊大敗賊眾沈賊舩二十餘隻陣斬僞總兵吳丙僞副將林勳等擒殺甚眾克復湄州南日平海崇武諸嶼得旨嘉獎下部議敘○奉命大將軍康親王傑書奏海中大定小定地方逼近廈門金門係我師必由之道逆賊鄭錦遣僞將軍張志屯糧聚眾欲踞此地以與我師相拒臣遣駐防杭州副都統吳申巴圖魯率滿洲綠旗官兵齊進大定地方奮勇勦殺賊不能支皆逃往小定我兵尾追賊眾不得船者淹入海中焚毀賊巢遷

回百姓大定小定悉行恢復得旨嘉獎下部議敘尋又奏二月二十三日大兵水陸分進規取玉洲賊首劉國軒向石馬海澄奔竄我兵追勦甚急劉國軒復走廈門僞總兵蘇堪等守海澄隨遣官諭以投誠蘇堪卽開西門迎接官兵入城玉洲石馬海澄等地方悉行恢復得旨嘉獎下部議敘○福建總督姚啟聖奏臣等見水師提臣萬正色孤軍獨下於二月二十三日同總兵趙得壽黃大來平南將軍賴塔分統水陸官兵七路進勦將弁俱各奮勇攻破陳州馬州灣腰山觀音山展旗等寨一十九處殺賊甚眾下部議敘○乙巳福建巡撫吳興祚奏二月二十六日臣同甯海將軍喇哈達總兵王英等由同安進勦逆賊至涵州灣尾等地方宣諭僞將獻城投降隨分兵三路徑渡廈門逆賊潰敗二十八日進廈門城安撫人民卽遣官兵進取金門得旨嘉獎下部議敘○丁未安

遠靖寇大將軍貝勒察尼奏是月十三日我兵取辰龍關抵辰州賊潰遁僞知府傅祖祿等以城降僞將軍楊有祿周楨楊寶蔭祖述舜等各率兵投誠綏遠將軍湖廣總督蔡毓榮亦奏復銅仁府瀘溪澈浦麻陽三縣得旨嘉獎下部議敘○諭議政王大臣等今楓木嶺辰龍關俱已恢復四川廣西悉皆底定雲貴不日可平若行招撫更可速定雲貴人民亦得早安其生張起龍本吳三桂屬下之人宜使招撫雲南可冀其罪捧敕前往○甲寅浙江總督李之芳奏海逆連舩飄突臣密飭定海舟師操練精熟遇警卽行剿滅二月十八日遊擊衛聖疇等於孝順洋曉有賊船率領官兵血戰沈賊船十四隻燒毀五隻陣斬僞參將童耀等一十九員擒獲僞官兵一百餘名下部議敘○丁巳九卿會推江西按察使左通政張可前大理寺少卿張永祺合詞保舉福建副使道張仲舉畫

題時御史唐朝彝曰我閩人也知張仲舉爲官平常不應保舉九卿因不復保舉都察院及六科給事中合奏公參下吏部議尋議覆唐朝彝當九卿會推時並無一言畫題時乃言張仲舉居官平常又不明指其過身爲言官殊負職掌應革職上曰廷推事關重大或舉或否原係各據所見備眾口附和而無一人爭執豈能無黨同之弊今若將唐朝彝議處將來推舉之人或有徇私請託者誰肯直言指摘耶著從寬免○以吳毓珍爲湖北按察使由武道還柯永昇爲江西按察使由湖北糧道還○己未命五城賑廠再展兩月期○是月免江南山陽山東淄川等二十四州縣去年被災額賦有差

夏四月辛酉以旱詔大學士會法司錄囚矜疑者奏減○壬戌上御懋勤殿講官進講畢上曰觀尙書內古來君臣無不交

相勸勉如此何憂天下不治葉方藹奏曰 皇上念及此真四海
蒼生之福○定遠平寇大將軍貝子章泰等奏參贊軍務都統穆
占會同總督董衛國率官兵進取沅州擊敗僞將軍吳應麒等恢
復沅州又遣官兵恢復靖州通道縣黎平府僞知府劉應僞副將
周鼎等率僞文武官及土司等來降得旨嘉獎下部議敘○丙寅
復設四川永甯總兵官○丁卯諭吏部朕萬幾之暇畱心經史雖
遜志時敏夙夜孜孜而研究闡發良資講幄之功日講起居注各
官俱以學行優長簡備顧問講解明晰奉職勤勞所纂講義典確
精詳深裨治理侍讀學士張英供奉內廷日侍左右恪恭匪懈勤
慎可嘉高士奇杜訥學問淹通居職勤慎供奉有年應授爲翰林
官爾部一併從優議敘具奏以後著益殫心職業佐助典學以副
朕崇儒重道稽古右文至意○戊辰 上御懋勤殿講官進講畢

上曰律與例不容偏廢律有正條自應從律若無正條非比例何以定罪總之用律用例俱在得人○己巳 上御懋勤殿講官進講畢 上曰堯舜禹湯以來心法治法俱在尙書爾等每日悉心講解朕孜孜典學雖不能媲古帝王而此心朝夕懋勉未嘗稍懈也庫勒納奏曰書經應講者已畢自明日始當以易經進講

上曰朕思經史俱關治理自宜進講爾等可進講易經將通鑑講章陸續送入著張英在內每晚進講通鑑○以王新命爲湖廣巡撫

由江西布政使遷

○辛未諭吏部比來言官言事鮮非無因意所不

欲卽行彈劾儻遇勢要之人縱知其貪穢亦不肯糾參總由心術不正之故若言官正則外吏自不敢肆行貪婪矣○丙子 上躬詣 天壇禱雨○戊寅靖南王耿精忠奏請陞見得旨耿精忠著來京○己卯刊尙書講義頒行天下○定遠平寇大將軍貝子章

奏奏恢復沅州之後僞義勝將軍吳有蛟僞參將徐國楨僞按察使謝龍等並貴州黎平府龍里蠻夷長官司楊勝締等各率僞官兵投誠下部議敘○奮威將軍平涼提督王進寶以疾求罷命回固原任調理標下官兵著伊子王用予暫行統領駐紮保甯進剿雲貴之時隨征前進○遣侍郎薩穆哈再賑直隸○兵部議覆奮威將軍平涼提督王進寶奏見在恢復重慶所有招撫僞總兵路之嵩江有倉僞將軍楊來嘉等望風向化應否議敘查恢復重慶係逆賊投順之後非係攻克應毋庸議至其傾心歸誠情有可矜應行令該將軍酌量給劄令其效力得旨路之嵩江有倉楊來嘉俱著來京引見酌用○甲申 上幸西山觀禾是日還宮○戊子福建水師提督萬正色奏閩省之患海甚於山防守之宜水重於陸海澄廈門浯嶼金門圍頭海壇平海定海烽火門日湖獺窟永

甯銅山南澳等十四處或孤懸海上或濱海要衝若以兵三萬人設鎮分防不時巡緝則賊不能肆犯我兵得以乘機滅寇矣上諭海防設兵所關最要令兵部侍郎溫代前往會同尚書介山侍郎吳努春及總督巡撫提督親詣諸處詳閱定議

五月庚寅飭步軍統領司坊街道巡捕營等官懲貪蠹禁科歛○壬辰命甘肅巡撫自鞏昌移駐蘭州○議敘講官翰林院掌院學士葉方藹等加銜進秩有差○乙未諭大學士等嗣後投誠官員不必令隨大兵進剿督撫提督酌遣來京候缺敘用○戊戌予故直隸巡撫金世德祭葬諡清惠○庚子以王日藻爲江西布政使由浙江按察使遷○諭兵部移文各路大將軍督撫提鎮等凡有平定雲貴恢復城池者俱令察訪吳三桂與達賴喇嘛相通書札隨得隨繳○癸卯諭大學士等向以亢暘齋居虔禱雖雨澤薄降四野田

疇尙未霑足今茲不雨朕甚懼焉意者政事之失宜者多歟不然天心仁愛下民何其宜雨而久不雨也日者以政理之故求言而言者文繁無益其集九卿詹事科道掌印不掌印各官問今有何事當行何事當革悉意以陳毋有所隱於是大學士傳諭旨同九卿等入見戶部尙書伊桑阿等各以所見陳奏上曰爾等所奏尙屬膚詞儻大小臣工俱能秉公奉法則天下何難治平凡在朕前所言似乎公正退而種種行私徇情作弊爾等撫衷自問能無內愧乎至於科道官瞻顧私情罔克糾舉內外官員恣行無忌職此之由爾等意中若尙有未盡事宜可一併親寫來奏諸臣出復命大學士持上諭徧諭諸臣曰朝廷致治惟在端本澂源臣子服官首宜奉公杜弊大臣爲小臣之表率京官乃外吏之觀型大法則小廉源清則流潔此從來不易之理如大臣果能精白乃心

恪遵法紀勤修職業公爾忘私小臣自有所顧畏不敢妄行在外督撫各官自應慎守公令潔己愛民乃大臣等每自謂清正無私粉飾空言至其所行往往營私作弊有玷官方深負委任之意科道係耳目之官凡有弊端自當據實參奏且居處甚近如此情弊豈無見聞乃瞻徇情面緘默不言卽有條奏多係繁文言官職掌殊爲未盡如從公糾舉孰敢恣行無忌朕以爲目今之弊莫大於此近因天氣亢旱朕夙夜焦思念慮所及無不舉行感格之道猶恐未盡故特詔爾等各面陳所見因宣諭朕意令爾等知之○甲辰平南將軍都統賴塔奏四月二十一日臣會同提督侯襲爵大敗海寇於潮州府大濠堡磊石等處下部議敘○乙巳山東巡撫施維翰奏河道總督靳輔丁憂得旨河工漕運事關重大見今工程未完不便卽准守制俟工成之日著靳輔自行題請○丙午奉

命大將軍康親王傑書奏平南將軍賴塔等遣發官兵追剿海賊
劉國軒等於三月十二日克取銅山焚毀賊巢得旨嘉獎下部議
敘○丁未以教化新爲浙江按察使由陝西糧道遷○奉命大將軍康親
王傑書奏甯海將軍喇哈達等陸續招撫僞總兵楊祿張輝等大
小僞官共二千五百餘員兵丁二萬五千九百餘名下部議敘○
己酉戶部請於山海關設官收稅從之○丁巳綏遠將軍湖廣總
督蔡毓榮奏原任宜都遊擊嚴宏身被賊擒堅拒僞職乘間來歸
應行議敘得旨嚴宏當逆賊初叛時獨守宜都後被賊擒不受僞
職保守原受敕書乘間來歸忠貞可嘉著從優議敘尋部議應加
都督同知卽以總兵官補用從之○卹贈福建殉難總兵吳萬福
知府王之儀同知俞三畏知縣劉嘉猷李塤等官爵諡廕○是月
免江西甯州南昌等六十六州縣衛所去年旱災額賦有差

六月癸亥勇略將軍雲南貴州總督趙良棟奏四月初八日賊以勁卒犯永甯官兵鏖戰彌日賊猶不卻投誠總兵官李芳述等奮勇衝擊斬僞總兵毛有貴等賊始大敗逃遁陣斬千餘人下部議敘又奏李芳述前旣率眾來降今復固守永甯不爲賊誘請破格加恩 上命李芳述爲隨征總兵官隸趙良棟標下隨征效力○甲子諭恪純長公主公主被反叛所累屢年困頓朕每念及未嘗不爲惻然不意深染時證適乳媪及親近侍衛往視及回轉奏公主之語不勝感歎又聞病勢危篤卽命該部院衙門將服飾執事等項星夜製辦今公主體中大愈將此各項盡送公主處以示朕惓惓注念之意○綏遠將軍湖廣總督蔡毓榮奏投誠僞總兵李者祿會同隨征總兵官鄧秉志等攻取思南府與賊兵酣戰兩晝夜斬賊千餘復府城得旨嘉獎下部議敘○廣東廣西總督金光

祖奏官兵進取武宣縣逆賊范齊韓等宵遁黃明等猶據縣城抗拒水師總兵官譚昇等奮擊大破之斬獲無算恢復縣城得旨嘉獎下部議敘○丁卯先是以雲南貴州提督桑峨總兵官周邦甯等自常德澧州退還上命大將軍察取供詞至是安遠靖寇大將軍貝勒察尼取供具奏兵部議覆桑峨職任總統調度全省官兵一聞賊警不卽直赴常德以扼要害乃遷延日久始自荊州進發致常德爲賊所踞又不入守澧州但於城外駐營六日復致澧州被陷且稱彝陵一路賊警甚急託故引還應行革職周邦甯偕桑峨赴常德時託病畱澧州迨桑峨還自常德又不入澧州防守卽同桑峨奔還應削去所加五級仍降一級調用得旨桑峨革職周邦甯革去所加五級仍降一級俱畱原任戴罪圖功○甲戌奉命大將軍康親王傑書奏僞將軍江機等聚眾恃險通連海寇爲

福建江西浙江三省之害已久今福建巡撫吳興祚等宣示招撫江機等率領僞官一千一百三十八員兵丁四萬三千六百二十九名投誠各分別歸農補伍下部議敘○丙子廣東巡撫金僞奏逆賊流言欲分調尙之信所部兵往雲南安置各營於是藩兵入千人聞之盡恐五月十三日夜遂鼓譟拔營遁歸上命將軍賴塔特郎宜昌阿總督金光祖巡撫金僞都統王國棟等設策安撫逃兵發回廣西○丁丑命五城粥廠再展三月遣太醫三十員分治饑民疾疫○安親王岳樂奏故平南王尙可喜妻舒氏胡氏首告孽子尙之信罪逆當誅乞轉諭官吏密圖擒拏請旨正法得旨尙之信並原告干證著侍郎宜昌阿等押解來京質審○庚辰鎮南將軍莽依圖奏報進剿柳州路經賓州陶登地方有賊二萬突來侵犯都統希福副都統馬世泰率兵攻擊逆賊大敗拋棄盔甲

器械走入深山下部議敘○揚威大將軍簡親王喇布奏官兵復
碓谷縣得旨嘉獎下部議敘○廣東巡撫金僑奏委署虎門副將
張瑜進剿逆賊謝昌等五月十二日於大灣海面分兵三路與賊
船三百餘接戰我兵奮勇衝擊賊敗走乘夜窮追十三日早至鳳
頭港又有賊船百我兵復擊敗之生擒僞將軍洪元懿毀賊船二
百餘斬賊二千餘級溺死者萬餘人謝昌等由外洋遠遁下部議
敘○福建總督姚啟聖奏臣前任藩司時親抵澳東招撫征逆將
軍劉進忠等獨有僞總兵馬興龍從中梗阻臣多方勸諭方肯從
眾就撫詎意受撫後密挈眷口復叛入海臣偵馬興龍逆踪往來
銅山南澳等處臣密遣總兵官朱光祖招撫僞將軍朱天貴等諭
以如遇馬興龍用心磨繫今朱天貴已暗拘馬興龍父子及第五
人沈死海中各僞鎮始隨朱天貴投誠朱天貴於未經投誠之先

能誅已撫叛賊實心報國功不可泯下部議敘○壬午刑部題兵
丁陳德擅殺雷元伯應斬監候 上諭曰凡大兵經過之地將弁
宜嚴加約束務令秋毫無犯屢經降旨申飭今兵丁陳德任意逗
遛擾害小民殺死人命該管將弁所司何事爾等不思嚴察竟置
不議殊屬不合可一併嚴加議處尋議該管官夸蘭大馬順德署
副都統馬爾齊哈約束不嚴各擬降罰得旨馬爾齊哈等縱所管
兵丁擾害地方殺傷民人深爲可惡嗣後大兵陸續回京若不嚴
加懲創則將卒無所警戒所議尙輕馬爾齊哈著降四級仍畱參
領馬順德著革職○揚威大將軍簡親王喇布奏臣與將軍莽依
圖總督金光祖等率滿漢官兵分路進剿馬承廕五月初四日金
光祖統兵敗賊於武宣復縣城初八日莽依圖兵敗賊於陶登乘
勝前進遂定象州臣兵於初四日至雒容縣進取柳州十七日馬

承廕率僞文武官弁六百六十餘員兵七千三百餘名詣軍門降
柳州平得旨嘉獎下部議敘○甲申 上以御書大軸賜大學士
索額圖勒德洪明珠李蔚杜立德馮溥諭曰朕萬幾餘暇畱心經
史時取古人墨蹟臨摹雖好慕不褻未窺其堂奧歲月旣深偶成
卷軸卿等佐理勤勞朝夕問對因思古之君臣美惡皆可相勸故
以平日所書者賜卿方將勉所未逮非謂書法已工也卿等其知
朕意又以 御書卷軸賜學士庫勒訥葉方藹詹事格爾古德沈
荃侍讀學士牛紐常書崔蔚林蔣宏道侍講學士張玉書嚴我斯
侍講董訥王鴻緒各一諭曰爾等日侍講筵夙夜匪懈啟沃之暇
每以朕書爲請朕萬幾餘閒研精典籍間取古人墨蹟臨摹爾旣
爲文學侍從之臣卽有成就德業之責故因所請輒以頒賜朕意
其悉之

東華錄

臣王先謙敬

臣周澐蕃恭校

秋七月辛卯諭兵部初馬承廕及所部官兵背叛蹂躪疆土擾掠生民罪惡已極後見湖南平定廣西恢復窮迫請降朕欲生民早獲甯息悉貰前罪封以伯爵授以將軍仍令管兵標員亦分營補用及大兵規取雲貴無故背恩復叛致誤征討大事今因兵敗勢蹙復窘急來歸令內閣學士薩穆哈速往撥滿漢官兵押解馬承廕及標下守備以上官來京其標兵令督撫提鎮等分隸各營汰其老弱回兵亦宜散置切勿令其黨聚廣東諸處被難人民詳察遣還故土提督哲爾肯可屯駐柳州○甲午御史張志棟奏各部主事不係正途出身者請令各部堂官保舉方許升轉九卿議不

准行 上曰各部主事日後皆升道府與其俟爲道府後令督撫

保舉何如爲主事時卽令堂官保舉之爲愈耶今後應令不係正途出身之主事歷俸三年果能勝任該衙門堂官保舉方許升轉

○吏部議覆左副都御史郝浴奏考選科道官應將正途加捐者仍照例考選其非正途出身之員雖係保舉止照常升轉不准考選從之○丁酉先是左都御史覺羅舒恕以病還京 上諭議政王大臣等左都御史覺羅舒恕當進定廣西之時奏稱病劇乞還肇慶調治朕以舒恕身爲將軍病篤必實令其暫回肇慶後又以敕印私繳將軍莽依圖莽依圖代爲題請朕以舒恕之病危篤欲其生還召回京師今觀舒恕全無病狀神色如故舒恕前在高州奔回肇慶復自廣州敗還不據韶州南雄諸要地竟還贛州江西全省因而震動及在江西又復擄掠大擾百姓以巡撫金儁之言

盡洩於平南王又恐嚇將軍巡撫傅宏烈云汝若題請進兵我必殺汝舒恕身爲將軍負如許重罪不思勦力以贖罪愆反詐稱患病凡爲將帥者儻皆如此肆行欺罔軍法何以得申舒恕應羈禁宗人府俟旋師之日嚴察議奏至是革舒恕左都御史佐領及世職○戊戌贈福建殉難浙閩總督范承謨太子少保兵部尙書子祭葬加祭一次謚忠貞廕一子入監讀書巡海道陳啟泰通政使司通政使並妻劉氏子祭葬廕一子入監讀書○己亥貴州巡撫楊雍建奏撫標見有二營請再設一營以備戰撫部議不准行得旨貴州係新經恢復之地最爲緊要應准該撫所請設立三營後不爲例○甲辰吏部議覆左副都御史郝浴奏各部院司官賢否不一請令各堂官畱心查驗每歲終各舉劾一人舉者照薦舉註冊劾者照例處分以昭懲勸從之○置奉天金州營○四川石砭

宣慰司馬萬年酉陽宣慰司冉永沛率眾內附○乙巳以折爾肯

爲左都御史

由吏部侍郎遷

○戊申贈廣西殉難巡撫馬雄鎮太子少保

兵部尙書並妻李氏予祭葬加祭一次諡文毅廕一子入監讀書

○己酉先是

上命甯南靖寇大將軍順承郡王勒爾錦率兵赴

重慶勒爾錦不能前進半途自返至是具奏自劾請解大將軍任

發往沅州軍前效力得旨勒爾錦既託故還荊州又奏請發沅州

效力不合其攜大將軍敕印率所屬護衛各官王府佐領兵同沅

州官兵還京○庚戌調薩穆哈爲吏部左侍郎

由戶部調

○壬子 皇

子允祐生○癸丑廣東廣西總督金光祖奏尙之信藩下鼓譟逃

亡之兵聚眾妄行臣見與賊對壘請發兵助剿

上諭近將軍賴

塔都統王國棟報遣總兵官甯天祚等率兵剿撫鼓譟之兵若甯

天祚等力不能剿著將軍賴塔巡撫金僑提督侯襲爵都統王國

棟公同酌議增兵速行勦撫以靖疆圉○乙卯轉達都爲戶部左侍郎調覺羅沙賴爲戶部右侍郎由盛京工部調○是月免山東益都等五縣蠲災直隸廣平縣去年水災額賦有差

八月丁巳朔敘招撫逆賊功加福建總督姚啟聖兵部尙書銜○己未詔盛京滿洲自墾地畝毋入官○辛酉諭兵部臺灣澎湖暫停進兵令總督巡撫等招撫賊寇如有進取機宜仍令明晰具奏

○壬戌勘盛京未墾地畝分給旗民設立邊界○以廖旦爲盛京

工部侍郎

原任工部侍郎

○甲子先是令大將軍貝子章泰等由沅州取

貴州大將軍簡親王喇布等由廣西取雲南將軍吳丹趙良棟會

兵取遵義後亦進貴州至是章泰奏貴州地方褊小難以得糧

上諭吳丹等得遵義後毋經貴州卽進取雲南大兵進勦之期定

議奏聞後卽檄湖廣廣西大將軍將軍等如期會舉○綏遠將軍

湖廣總督蔡毓榮奏請特降敕旨招撫逆賊吳世璠兵部議從其請上諭大學士等吳世璠爲賊渠魁恃其險阻抗拒官兵殘害生民罪惡重大朕敕炳如日星豈可輕頒且賊勢迫自行納款如未至窮促雖招撫何益況前招撫賊將吳應麒胡國柱敕內俱有曉諭吳世璠歸誠之語蔡毓榮將此處並不揆度不圖早滅逆寇乃欲降敕招撫率意妄奏兵部竟准議行均屬不合此奏可付兵部令該部密行嚴飭○建威將軍吳丹奏土司副將加都督斂事銜徐升耀往保甯招撫賊首王屏藩等遇害請加恩卹得旨徐升耀係土司官員乃克篤忠貞捐軀殉難深爲可憫作何恩卹著從優議敘尋部議照陣亡總兵官例贈左都督侯克復雲南之日查伊子弟一人授以管土兵守備給卹銀從之○戊辰上御經筵○福建總督姚啟聖奏僞將軍楊彪卽楊一豹率領僞官兵三萬

一千餘員名投誠下部議敘○綏遠將軍湖廣總督蔡毓榮奏逆賊馬承蔭下僞總兵劉應龍擁眾駐梅寨貴州提督趙賴遣官招撫劉應龍率所部降下部議敘○己巳諭兵部前因尙之信屬員張永祥等首尙之信諸不法事朕欲明其虛實故令尙之信來京非以張永祥所言皆實必欲治尙之信以法也平南藩下官兵本朝豢養四十餘年世受國恩最爲深厚初無欲行解散之心且諸官兵宜常念國恩釋去嫌疑各保身家妻子以副朕恩養保全至意其令將軍賴塔侍郎宜昌阿等宣布朕意咸使聞知○壬申諭揚威大將軍簡親王喇布聞南甯距雲南邊界路僅七站向因逆賊尙之信馬承蔭背叛或未可輕進今若輩皆已無濟復何所瞻顧而遲延也見在廣西滿兵每佐領幾三十人宜精選強壯有馬者各十人益以綠旗官兵協力進剿賊可立破矣王其速圖之進

兵之時令巴爾堪哈爾哈齊爲夸蘭大賚以軍前報效○癸酉以李光地爲內閣學士

由翰林院侍讀學士遷

○戊寅保和殿大學士索額圖

以病求罷命於內大臣處上朝○己卯諭吏部科道爲耳目之官關繫最要必選用得人方能稱職漢官皆由行取考選補授惟滿官論俸敘升著吏部都察院將見在滿洲給事中監察御史會同選擇堪用者仍留原任不稱職者對品調於部院衙門用○壬午鎮南將軍莽依圖卒於軍以都統勒貝代之○山西巡撫圖克善以病求罷允之○甲申先是吳三桂反尙之信欲其父尙可喜從賊迫之不已尙可喜憤死尙之信遂降吳逆及其歸正仍懷兩端上數命進兵潮州湖南尙之信不行永興危急亦坐視不救後雖出師輒自引退總兵官時應運水師遊擊張瑜出勦賊尙之信俱密止之令頓兵不進及尙之信協勦廣西復與尙之璋等謀令

以計調還廣州冒兵餉擅殺無罪人甚至希邀異數毀訕乘輿於是藩下人張允祥張士選來京告其諸不法事尙之信母舒氏胡氏都統王國棟廣東廣西總督金光祖廣東巡撫金僞亦相繼奏列其罪 上遣刑部侍郎宜昌阿與王國棟等謀密檄總督金光祖提督哲爾肯總兵官班際盛副都統金榜選等執之於武宣尙之信具奏抗辨 上不忍遽置於法命至京對簿尙之信謀益急令其弟尙之節等陰糾黨與誘殺王國棟欲爲亂將軍賴塔急率兵圍之尙之節就擒賴塔等訊鞫悉得其狀而舒氏胡氏復飾言尙之信無謀叛逆前告變奏皆王國棟僞爲也事聞下議政王大臣等集議於是議政王大臣等議裂尙之信當依謀反律母母弟凡同謀者俱棄市家產籍沒其諸弟尙之孝尙之璋尙之隆等雖不同謀法應革職枷責得旨平南王尙可喜航海歸誠效力行間

鎮守粵東著有勞績及吳逆叛堅守臣節不肯從逆爲逆子尙之信所迫憤恨殞命朕每念及深爲憫惻其妻舒氏胡氏從寬免死並免籍沒尙之孝尙之璋尙之隆等俱從寬免革職枷責尙之信不忠不孝罪大惡極法應立斬姑念曾授親王從寬賜死其餘逆黨尙之節李天楨等悉按律正法○丙戌諭侍郎宜昌阿等爾等所行事宜俱各得當甚爲嘉悅朕意所及數事特行密諭一尙之信雖經犯法伊等妻子不可令卑賤小人陵辱應查明嚴禁遣人護送來京一廣東所有大市小市之利經藩下諸人霸占者無算可會同巡撫詳察應歸百姓者題明仍歸百姓則廣東人民得霑無窮之惠矣一聞藩下所屬私市私稅每歲所獲銀兩不下數百萬當盡充國賦以濟軍需一各省商販人等欲藉藩下行勢投入者甚多皆須查明應斷出者卽行斷出其不應斷出者宜盡行遣

發來京勿致逃亡隱漏一尙之信等所有貲財用充軍餉已有諭旨務須詳行稽查毋致有遺漏侵剋等弊

閏八月丁亥朔九卿議覆河道總督靳輔奏山陽清河等五縣河水衝決隄岸請將臣嚴加處分應令靳輔將河隄決口卽行修築俟工竣之日遣大臣往閱如修築不堅固另行議處從之○己丑勇略將軍雲南貴州總督趙良棟奏僞將軍海潮龍投誠繳送劄印欲聯絡迤西一帶身任前驅請敕諸路將軍大臣速發官兵糧餉以爲接應 上諭今進取雲南爲期已近將軍吳丹率兵進瀘州取合江仍兩路進取雲南湖廣大將軍將軍總督等宜速取貴州大將軍公圖海等趣所調陝西兵往四川海潮龍感戴國恩率眾獻地先機效順可嘉投爲懷忠將軍令統所部爲前導破賊至賊帥張國柱李本深王會高啟隆俱係舊臣或一時迫脅降賊亦

未可定宜如招馬寶等例書赦罪敕馳檄發趙良棟相機招撫陝西四川督撫速運糧餉毋誤兩路大兵進剿機宜○壬辰以穆爾賽爲山西巡撫

由布政使遷

○甲午四川總督楊茂勳奏逆賊僞將軍

胡國柱王會等領賊兵戰象突犯納谿瀘州總兵官謝泗等兵力單弱退保隆昌得旨進剿雲貴各路大兵雲集四川據奏瀘州納谿二處乃爲賊破其領兵將軍該督撫提鎮各官防禦何事殊屬怠玩著嚴議具奏○丙申定遠平寇大將軍貝子章泰奏蔡毓榮奉有調遣漢軍之旨今進取貴州滿漢旣已合兵若各自調遣彼此不相知會恐於事機無濟 上諭蔡毓榮進取貴州凡屬軍機俱關白大將軍商酌行之○丁酉 上幸南苑行圍○癸卯 上還宮○戊申工部侍郎張問政以疾乞休允之○是月免直隸武清等十四縣衛山西大同遼州山東濟甯等州縣被災額賦有差

九月丙辰朔以金鼐爲工部右侍郎

由宗人府府丞遷

○子故原任兵部

尙書喀代祭葬○庚申以那鼐爲山西布政使

由給事中遷

○戶部題

尙之信等有私行收稅之項已令督撫嚴查題明豁免今耿精忠

在福建恐亦有私行收稅之處應行文督撫查明報部一體豁免

從之○壬戌勇略將軍雲南貴州總督趙良棟奏李芳述鄒九疇

係投誠後遵旨設立領兵之總兵也值仁懷合江失守瀘州復陷

賊正鴟張勢在危急逆孽狡謀乘隙搖惑該總兵等矢心報國不

爲餌誘擒綁逆差鎮靖人心又隨征之副將蔣榮德及投誠僞總

兵未經受職之瞿洪等同心協力保守孤城奮志滅賊請加恩典

以示獎勵下部議敘○癸亥先是綏遠將軍湖廣總督蔡毓榮奏

臣已統兵入貴州境恐大兵進征之後內地兵單請調提督徐治

都駐常德防守

上從之至是徐治都奏瀘州永甯改州諸處具

陷譚宏等復叛夔州民變 上諭今譚宏復叛夔州民變將軍噶爾漢都統范達禮副都統塞格簡荊州大兵每佐領三人率之提督徐治都毋往常德亦率綠旗兵俱速赴夔州諸處剿滅叛賊餘兵署副都統諾敏率之鎮守荊州仍檄貝子準達率兵前來兩路夾剿毋失機宜尋復諭常德要地亟宜堅守令襄陽總兵官劉成龍往鎮常德河南南汝總兵官周邦甯往駐襄陽○勇略將軍雲南貴州總督趙良棟奏湖廣大兵已集沅州永甯一路兵應直進雲南今將軍吳丹兵啟行將及一月猶未渡江如永甯不保賊勢愈張請嚴飭湖廣兵取貴陽分兵以取遵義令吳丹擊敗永甯賊卽乘勝進取雲南 上諭大將軍貝子章泰等可率兵速取貴陽分兵以取遵義將軍吳丹往取瀘州行及一月逗畱猶未渡江不合其速令取瀘州剿除來犯永甯諸處賊寇今湖廣四川大兵各

路分進廣西將軍大臣不得以兵士無馬爲辭將軍勒貝體朕擢用之意速率大兵乘機由南甯進定雲南○乙丑諭議政王大臣等據將軍噶爾漢等奏逆賊譚宏率眾至巫山譚宏小醜耳我兵但奮力進擊彼自漸滅將軍噶爾漢提督徐治都等其溯江而上速定疆圉大將軍貝子章泰等果如前奏訂期亟進克復貴陽賊勢何至滋蔓今宜令章泰同將軍蔡毓榮等於文到日速進取貴陽以圖遵義四川諸將若能奮擊雲南貴州出犯之賊則譚宏無所逃匿自當摧陷今宜令專意進剿勿復觀望前此會命總督哈占馳赴將軍吳丹軍今宜令由保甯江直進破譚宏以會吳丹並行文大將軍公圖海酌發軍中滿漢兵爲之聲援以分賊勢至運餉四川不由彝陵江俱自陝西轉運敘州兵糧度可無虞頃令護軍統領佟佳等率增發四川滿兵赴原指之地其漢軍官兵一千

人文到日卽由荊門州一月內赴彝陵鎮守著戶部郎中額爾赫圖馳赴彝陵趣將軍噶爾漢等兵速滅譚宏諸賊額爾赫圖凡事俱準蘇赫臣例以行吏部郎中范承勳亦馳驛追及副都統張長庚軍趣其兼程而往一月內抵彝陵范承勳仍自彝陵趣追及噶爾漢等軍與額爾赫圖同趣官兵擊賊○諭議政王大臣等頃因逆賊侵徧四川滿漢大兵已諸路進剿大將軍貝子章泰等將軍總督蔡毓榮等於是月十二日以次進定貴州今廣西一路亟宜速入以定雲南將軍賴塔在福建廣東勞績素著可授爲大將軍赴廣西調遣廣西滿漢大兵由南甯直進速定雲南賴塔行日選廣州大兵內精銳有馬者或五百人或千人親率之赴南甯廣西所有一應大兵俱聽簡擇率往副都統博濟統餘兵暫守廣東賴塔敕印可速送往其原在平南藩下官兵如可帶往聽賴塔酌量

率之前行○以阿喇尼爲理藩院右侍郎

由一等侍衛遷

○戊辰諭兵部

覽安塘筆帖式蘇擺報九月初六日副都統塞格率每佐領兵一人往守彝陵夫譚宏向在保甯屢經奔敗兵仗全無今乘黔賊侵犯瀘州招集無賴持梃肆行刦掠將軍噶爾漢等不親身馳赴巫山夔州勦除小醜乃遣副都統塞格率每佐領兵一人往鎮彝陵殊屬不合如此遲延觀望儻此寇與黔賊合勢彼時破之不綦難乎噶爾漢等聞命卽統率官兵星夜馳赴巫山夔州扼其要害俾遊行羣醜不至滋蔓速爲勦除若仍逗留致逆賊與黔賊合勢至於猖獗將噶爾漢等治以失誤軍機之罪爾部其速行檄知○戊寅建威將軍護軍統領吳丹等奏臣統領官兵進取瀘州八月十八日署西安將軍事佛尼勒領頭隊官兵至豹子山瀘州賊渡江遁前鋒參領博鼎駐防西安夸蘭大倭黑追擊之賊大敗擒斬溺

水死者無算恢復瀘州得旨嘉獎下部議敘○刑部議覆撫遠大將軍都統大學士公圖海奏據投誠總兵楊勇祖之子楊廷卓城固縣民戴時坤舉首僞朱三太子廣散劄付行文漢中興安等州縣又據漢中通判孫世哲報於三河口地方拏獲賊首朱道士有僞安國大將軍木印劄付及兵械等道士供稱原名朱次門後改名楊起隆於康熙十二年間到京見吳應熊招集黨羽期十二月二十三日五更放火舉事二十一日事洩逃竄復改姓任爲道士本年七月至漢中糾黨舉事聞事洩欲逃入山於三河口被獲查僞朱三卽楊起隆於康熙十二年通行緝拏獲日與已獲之楊起隆妻馬氏親隨小廝小六兒並原夥鄭得勝等認識審理伊等見在監禁相應將楊起隆解部與馬氏等認識審理從之○辛巳詔將軍王進寶馳赴保甯兼守漢中○乙酉免廣西逋賦○是月免

直隸武清等十四縣衛山西大同遼州山東濟甯等州縣被災額賦有差

冬十月戊子彗星見於翼○己丑 上幸南苑行圍○癸巳署廣西巡撫右理事官麻勒吉奏七月十四日逆賊攻陷養利州新太參將昂三等於閏八月十一日敗賊於養利州之大橋賊棄城遁又逆賊鄒總兵等踞天河縣副將熊經等於九月初二日連破賊眾恢復縣城得旨嘉獎下部議敘○甲午 上還宮○勇略將軍雲南貴州總督趙良棟奏賊寇侵犯仁懷失守將軍吳丹擁重兵二萬不及赴援以致永甯復陷得旨成都去永甯路不過七八百里吳丹不及赴援遲至六十餘日貽誤已甚可速解將軍任還漢中同大將軍公圖海鎮守其四川官兵俱付將軍鄂克濟哈與趙良棟會商進剿蜀中情形不時奏報○丙申以大理寺少卿王繼

貞爲太僕寺卿○丁酉奮威將軍平涼提督王進寶奏臣標兵除調征湖廣外其餘臣子王用予統領進剿又陝西總督哈占調去二千餘名臣今無兵可統不得不於臣標帶回及畱守步兵內姑爲抽選並於固鎮營中量行調撥以足千餘之數更請敕督臣以固鎮官兵發還付臣統轄得旨逆賊旣侵犯四川譚宏彭時亨復叛保甯最屬要地今將軍王進寶速調固原各營官兵兼程馳赴保甯規定四川陝西總督哈占兩次所調之兵仍令王進寶統領○蕩寇將軍貝子準達奏逆賊譚宏彭時亨等陷涪州 上諭將軍噶爾漢等選每佐領兵三人提督徐治都親統漢兵速赴夔州諸處剿滅叛賊○己亥禮部題奉命大將軍康親王傑書凱旋應在蘆溝橋行拜 天禮畢卽赴鞏華城 仁孝皇后 孝昭皇后梓宮前行禮然後遣大臣告以王母妃之喪始歸私第得旨王出

征後有母妃之喪在王亦屬大故蘆溝行禮畢應卽歸私第臨喪
盡哀後再詣鞏華城○命陝西總督哈占率兵赴保甯討譚宏○
庚子諭大學士等各旗差遣家人或往外省索債或令隨官赴任
或以情面干求外官者甚多借端營私小民最爲苦累此皆不察
之故今若詳加察究則各旗不遣家僕出外者能有幾人此等累
民之事應行禁止令吏兵刑三部及都察院會同定例嚴禁尋議
旗人私往外省地方借端挾詐屬託行私犯擾小民等弊者係平
人枷號三月鞭一百係官革職鞭一百不准折贖失察佐領罰俸
三月驍騎校罰俸六月其差遣家僕之人係閒人鞭一百係官革
職差去之僕枷號一月鞭一百從之○辛丑試漢科道官於體仁
閣降不稱者三人○鎮安將軍都統噶爾漢奏副都統塞格於十
月初六日復巫山縣水師遊擊劉進朝等敗賊於跳口擒僞總兵

一員得旨嘉獎下部議敘○壬寅大將軍康親王傑書凱旋上
郊勞之○甲辰命給事中莫羅等傳諭大將軍圖海曰爾前奏暫
停諸路進兵其說雖是但恐停止進兵賊愈滋蔓前爾面請緩兵
朕下詔督戰始復岳州湖南逆賊悉潰後又請暫停入川之師朕
趣進兵遂平四川今賊以全力偏犯四川若從廣西南甯湖廣沅
州進取貴州則寇蜀之賊自潰從此諸逆漸平地方悉定諸軍可
以凱旋矣至投誠官員豈可深信宜畱置左右時加防範朕前屢
次密諭今譚宏彭時亨等果復叛亂朕向謂此輩俱在爾軍中不
意竟置之別所此等反叛之賊受爾何恩而乃輕信如是也嗣後
宜密防之○丁未上御懋勤殿親講易經噬嗑卦辭講官庫勒
納葉方藹等進所撰乾坤二卦總論上覽畢曰卦爻之義原各
不同卽如噬嗑一卦中四爻主用刑者言初上二爻主受刑者言

每文各有取義必得總論發揮方覺全卦之義了然諸卦可俱倣此撰進○戊申諭大學士等居官者宜以清廉爲尚官皆清廉百姓自得遂其生矣今朝臣有如于成龍之清者否馮溥奏曰順天府府尹宋文運亦有清名其家甚貧上曰清廉不在貧富謂富者必貪而貧者必廉可乎亦視其人居心何如耳○刑部右侍郎高珩以老乞休允之○定遠平寇大將軍貝子章泰奏臣自平溪衛與征南將軍穆占綏遠將軍總督蔡毓榮等領兵前進於十月十一日抵鎮遠府逆賊僞將軍張足法楊應選等夜遁恢復府城江西總督董衛國追敗賊於石巷口及大巖門抵油閘關穆占追勦逸賊復偏橋衛興隆衛得旨嘉獎下部議敘○鎮南將軍都統噶爾漢奏臣等統領大兵自巫山克捷進取夔州賊望風奔潰遂復夔州本月十四日又敗賊譚宏標下僞楊總兵於錯開峽殺溺

賊眾無算得旨嘉獎下部議敘○諭兵部將軍噶爾漢提督徐治都等恢復夔州但不知重慶消息可否相通令噶爾漢等速行奏聞至萬縣在萬山之中噶爾漢等防禦諸路其熟計保全今夔州既復宜令總督哈占速從保甯追勦哈占速進則賊不日撲滅至兩路分兵恢復鎮遠夔州事宜應移會在蜀大臣並檄知廣西大將軍賴塔等乘此機會速定雲南○辛亥議政王大臣等議奏順承郡王勒爾錦貝勒察尼出師湖廣罪案 上諭大學士等勒爾錦察尼統領大兵不能竭力底定地方但歛取督撫司道等官財物希圖肥家貽誤國事疲敝兵馬困苦民生失機之罪最爲重大前屢旨申飭竟置不聞安坐軍中致失大計一切罪犯孰有重於此者乎朕嘗揆度事務幸因修造戰船圍困岳州賊勢窮蹙爲我兵所敗故地方以次勘定否則不知作何景象矣我 太祖 太

宗時軍令極嚴今議政王大臣等因事已平定不復經意所議之罪不協事情概從輕典可乎王貝勒等輒言從前未經戰陣凡行間皆以未經領軍爲言則誰當領軍者王與貝勒俱朕至親朕本欲寬釋但貽誤國家大事罪實難逭其餘尙可從寬王貝勒決不容姑貸也爾等可傳諭議政王大臣等知之○壬子勇略將軍雲南貴州總督趙良棟奏參西甯總兵官朱衣客率官兵八千往援建昌於大王廟失利棄越嶲衛渡河退回上命革朱衣客職擬罪以聞○是月免福建泰甯縣去年水災江南泰州清河等二十三州縣衛水災額賦有差

十一月丙辰朔彗星見西方○戊午御史張志棟奏參刑部尙書黃機年老大理寺少卿張永祺國子監祭酒馮源濟物望不孚均應議處上諭大學士等張志棟參張永祺馮源濟二人品行不

端甚當又參刑部尙書黃機年衰老宜罷此言太過當國家用人正須老成練達之輩從來才德難以兼全聞黃機居鄉謹飭安靜是一老成人也○命旗下從征僕人得功牌二次者許令出戶○辛酉議政王大臣等議覆順承郡王勒爾錦貝勒察尼帥師討賊不速扼要害乃退縮不前老師糜餉坐失事機幾至誤國應革去王貝勒並議政及宗人府之職籍其家屬財產仍行拘禁貝勒尙善公蘭布不速勦賊寇恢復疆土退縮貽誤俱宜從重議處但既卒於軍應革其多羅貝勒鎮國公都統朱滿不速據岳州前驅破賊退縮不前幾至誤國應革都統拜他喇布勒哈番佐領及所加之級立絞籍其家其妻與未分家之子並交內務府都統鄂內不速據要地渡江破賊坐守彝陵聽賊渡江竊踞要害退縮不前幾至誤國應革去都統一等阿達哈哈番兼一拖沙喇哈番佐領及

所加之級鞭一百不許折贖本身及妻未分家之子沒入官家產
交內務府護軍統領伊爾度齊棄太平街不守不勦滅虎渡口賊
寇致太平街失陷應革職正法但已身故宜革去一等阿達哈哈
番兼一拖沙喇哈番籍沒家產其妻及未分家之子並交內務府
護軍統領額司泰不渡江速據要害長驅勦賊又不攻取岳州退
縮貽誤宜從重議處但已身故宜籍沒家產給予本主散秩大臣
多謨克圖身爲參贊率蒙古兵前往不卽協力渡江恢復疆圉得
賊空營冒爲已功復不力拒虎渡口出犯之賊致已獲之太平街
復陷於賊宜革去散秩大臣拜他喇布勒哈番及所加之級副都
統巴喀得賊空營亦冒爲功不力拒虎渡口出犯之賊致太平街
復陷宜革去副都統佐領及所加之級公圖納黑不速勦賊耽延
時日應行察議但賊已固守之後伊始至軍且屢有渡江擊賊之

請應免察議署前鋒統領噶爾弼係貝勒尙書參贊坐延時日寸步不前及奉諭申飭仍不思殫力破賊推諉巧飾執意退縮希冀全身不取岳州亦應察議但已身故無庸議奏入 上諭勒爾錦不渡江勦賊平定疆圉遷延瞻顧貽誤國家大事情罪重大削去郡王並議政宗人府之職仍令羈禁察尼應如議處分但旣克岳州且從前有效力之請著從寬免羈禁籍沒革去貝勒並議政宗人府之職爲閒散宗室尙善革去貝勒蘭布革去鎮國公朱滿從寬免死著革職鞭一百不許折贖籍沒其家鄂內屢戰湖中又恢復岳州從寬免籍沒鞭責著革職伊爾度齊多謨克圖巴喀等俱革職餘依議○召大學士九卿詹事科道諭曰白氣見於西方天象垂戒必有徵驗爾等各抒所見奏聞工部侍郎趙璟等奏近聞陝西轉餉入蜀人民滋困押運官又不知軫恤請敕部議作何

休息兵部尙書宋德宜奏陝西四川不必各設總督宜以一人統
理兩省庶人民勞逸可以酌劑均平 上諭吏部改陝西總督哈
占爲川陝總督其四川總督楊茂勳令解任隨大軍進取雲南○
甲子鎮安將軍都統噶爾漢奏臣等相繼進剿聞敗遁之賊與四
川雲陽賊合浚濠築壘水陸相拒臣念巫山夔州乃大兵後路須
兵固守 上諭將軍噶爾漢提督徐治都率兵恢復四川巫山夔
州更進取雲陽諸處賊方合力嬰城拒敵可移檄守荊州副都統
諾敏發紅衣礮八位礮手各二人星夜送至軍前備攻城之用徐
治都所增標兵五千招募不免遲緩其以均州房縣所裁鎮標之
兵及內地綠旗兵調往至巫山夔州諸要地宜速發兵鎮守副都
統得爾德可率兵往彝陵彈壓地方○定遠平寇大將軍貝子章
泰奏臣等恢復鎮遠卽分遣官兵進取貴陽十月十七日復平越

府並復新添龍里二衛二十一日直抵省城逆渠吳世璠僞將軍
劉國柄吳應麒等率眾夜遁遂復貴陽府其餘安順石阡都勻諸
府亦以次收復貴州全定得旨嘉獎下部議敘○發帑金十萬濟
常熟縣白茆港武進縣孟瀆河○丙寅撫遠大將軍都統大學士
公圖海奏瀘州逃散綠旗官兵不敢還營近永甯失陷建昌路阻
若不速行收撫將來或投入賊營或相聚爲亂其害匪細宜招撫
還營仍給糧補伍得旨著總督哈占將軍王進寶速招逃兵入伍
俾贖罪圖功○丁卯振武將軍鄂克濟哈等奏臣等於閏八月十
八日率兵復瀘州九月十二日進兵至托川呀與賊遇自午至酉
我師奮勇攻擊賊大敗棄營宵遁下部議敘○庚午四川陝西總
督哈占奏臣於十月二十四日抵保甯一面酌兵防守昭化蒼溪
諸隘一面揀選精銳付總兵官高孟一路由順慶蓬州進取營山

一路由南部進取營山復由營山會取渠縣俟剿滅彭時亨平定川北後再進剿川東逆賊譚宏得旨保甯關繫重要總督哈占暫駐鎮守侯將軍王進寶到日哈占卽率大兵剿譚彭二賊○吏部議覆直隸巡撫于成龍奏凡州縣被劾者例經府道揭報督撫訪聞乃州縣於參後復摭拾往事詳揭府道風不可長請定反噬訐告處分之例查定例京察大計降革官員有架言控告者將所告不准行有冠帶者革職無冠帶者送刑部治罪嗣後被參官員將上司訐告者照此例一體處分從之○癸酉轉黃機爲吏部尙書

由刑部轉

○甲戌振武將軍鄂克濟哈奏吳丹解將軍任後兩路官兵

俱臣統領但建昌永甯相去千餘里一身不能兼顧請分設一帥

進取永甯 上命署西安將軍佛尼勒爲建威將軍調遣永甯一

路滿漢大兵與總督哈占會商剿賊○乙亥予廣東陣亡縣丞陶

之後官廕○丙子四川陝西總督哈占奏川北總兵官高孟敗賊於南溪橋等處復營山縣得旨嘉獎下部議敘○戊寅以魏象樞

爲刑部尙書

由左都御史遷

○辛巳以陳一炳爲刑部左侍郎

原任吏部侍郎

○

壬午純親王富爾祜倫薨

上輟朝三日○癸未四川陝西總督

哈占奏川北總兵官高孟進兵羅石橋大敗賊兵斬獲甚眾又圍

逸賊於靈鷲寨殺僞總兵魏仰武等下部議敘○甲申綏遠將軍

湖廣總督蔡毓榮奏山西提督周卜世等於本月十四日進兵攻

奪塘頭隘口十五日復思南府得旨嘉獎下部議敘○定遠平寇

大將軍貝子章泰奏僞侍郎郭昌邱元僞總兵臧世遠齊聘金文

臺等率僞文武各官一百七十五員兵一千三百餘名投誠○乙

酉刑部等衙門議覆大將軍圖海拏解來京之僞朱三卽楊起隆

又名朱慈璫與康熙十二年拏禁之楊起隆妻馬氏及原夥鄭得

勝等並不認識且面有刺字疤痕明係旗下逃人入楊起隆夥內知其緣由遂借楊起隆之名於陝西造反應照律凌遲處死其馬氏等仍監禁俟緝獲楊起隆另結從之

十二月庚寅湖廣巡撫王新命奏逆賊譚宏侵犯夔州掠取糧艘得旨夔州乃運糧要地令護軍統領佟佳署副都統張長庚率兵速取夔州並令王新命速發徐治都新添標兵前往更檄副都統得爾德總兵官嚴宏加意防守彝陵諸要害○壬辰以徐元文爲

左都御史

由內閣學士遷

○癸巳署廣西巡撫右理事官麻勒吉奏撫蠻

滅寇將軍傅宏烈於貴陽陷賊賊授以僞職不屈十月初六日遇害得旨傅宏烈自投誠以來效力粵西著有勞績陷賊不屈捐軀殉難忠節可嘉深爲可憫應得卹典著從優議奏○甲午四川陝西總督哈占奏川北總兵官高孟大敗逆賊彭時亨於渠縣復縣

城得旨嘉獎下部議敘○乙未定遠平寇大將軍貝子章泰奏雲南提督桑峨援剿左路總兵官陳珀等自貴陽進剿十一月初十日大敗賊於永甯復其城追至難公背鐵索橋賊焚橋遁得旨嘉獎下部議敘○丁酉給事中額倫奏言各省漕糧應令道員押運上諭大學士等此言極當自宜允行運糧爲國家要務今河道狹淺恐誤運務著遣大臣一員將通州以南水淺處察勘挑濬爾等可傳諭工部○定遠平寇大將軍貝子章泰奏十一月初九日僞總兵蔡國昌率所屬弁兵一千一百餘名及平遠府僞知府鄭開樞等投誠獻平遠府城隨令蔡國昌仍統原兵鎮守平遠僞文武官員各給劄付照舊供職下部議敘○戊戌以勒爾錦子勒爾貝襲順承郡王○庚子 上幸南苑行圍○辛丑定遠平寇大將軍貝子章泰奏普安州土官龍天祐永甯州土官沙起龍禮廷試

等傾心向化各率土兵勦敗賊眾造盤江浮橋以濟大軍得旨嘉
獎下議政王大臣等議敘○揚威大將軍簡親王喇布奏僞將軍
饒一龍總兵劉晉文尹泰蔡琦等率文武僞官三十九員兵五百
三十八名投誠獻慶遠府城下部議敘○敘恢復鳳縣兩當武關
漢中保甯功授奮威將軍左都督王進寶爲三等精奇尼哈番准
襲十次陝西固原總兵官右都督王用予爲左都督給一拖沙喇
哈番○四川陝西總督哈占奏川北總兵官高孟追逆賊彭時亨
於十一月二十五日大敗賊眾復廣安州得旨嘉獎下部議敘○
戊申 上還宮○庚戌以郝浴爲廣西巡撫由左副都御史遷○是月免
直隸唐縣等十三州縣衛旱災額賦有差○是歲朝鮮琉球來貢
○人丁戶口一千七百九萬四千六百三十七田地山蕩畦地五
百二十二萬七千六百六十六頃八十七畝徵銀二千二百一十

五萬五千六百七兩三錢有奇米豆麥六百二十五萬三百四十
五石七斗有奇草二百四十五萬二千六百一十九束茶十五萬
五千三百六十五引行鹽三百九十八萬三千七十二引徵課銀
二百三十九萬九千四百六十八兩三錢有奇鑄錢二萬三千一
百三十六萬五千三百六十有奇

東華錄

康熙二十七

臣王先謙敬編

臣周澹著恭校

康熙二十年辛酉春正月辛酉定遠平寇大將軍貝子章泰等奏
雲南土司龍天佑迎降請身率土兵防守要隘 上命以龍天佑
爲都督僉事管領土司總兵官○丙寅諭議政王大臣等貝子章
泰等若乘逆賊敗走雲南之際卽行追躡則雲南早已蕩平乃先
借秣馬逗留今復以逆賊肆犯推諉殊屬不合目前逆賊困迫已
極旦夕滅亡若不乘機剪除恢定滇土更需何日且大將軍賴塔
等兵抵田州卽進定雲南爲日已久章泰等於諭旨到日卽率滿
州綠旗大兵之半速進雲南至於貴州亦屬重要可選賢能大臣
及總督提督等統所留之兵令其固守章泰等若仍前逗留不疾

馳進定雲南旋師日從重治罪○辛未理藩院議覆給事中雅齊納奏外藩蒙古入貢每有奸惡通事詭計騙誘宜加嚴禁 上曰此奏極爲中理光棍人等每指稱通事豫往邊外羈占外藩貿易之事情罪可惡應令理藩院嚴行禁止○壬申定遠平寇大將軍貝子章泰等奏原任貴州提督從逆李本深及大小文武官悉繳僞印劄歸誠 上命解送李本深來京餘員量行安插俾其得所○癸酉定遠平寇大將軍貝子章泰等奏雲南提督桑峨招撫僞總兵徐朝慶劉大壽及僞文武官員羅應鳳等投誠○四川陝西總督哈占奏川北總兵官高孟復鐵山關後至達州賊棄城遁追殺賊兵百餘獲器械無算得旨嘉獎下部議敘○甲戌鎮安將軍都統噶爾漢奏逆賊譚宏已於康熙十九年十二月十一日死臣等率兵進剿敗賊眾於雲陽縣擒僞總兵向旭輝等復縣城譚宏

子譚天祕震懼焚萬縣巢穴而遁萬縣開縣建始梁山忠州悉平
得旨嘉獎下部議敘○廣西提督哲爾肯奏大桂山賊寇黃明等
投誠○乙亥命兵部右侍郎溫代濬通州運河○丙子諭兵部今
譚宏黨與俱已就戮萬縣諸地悉經收復將軍噶爾漢其簡選士
馬疾赴重慶盡統貝子準達軍速定遵義副都統得爾德等兵亦
聽調萬縣地處狹隘難以飼馬可趨至重慶秣馬而進噶爾漢軍
中效力有年困乏無馬者悉令準達率還荊州至於夔州要地令
提督徐治都率標兵暫駐防守總督哈占可率所屬兵馳赴敘州
府與大兵協力前驅剿滅○丁丑予故原任工部右侍郎張問政
祭葬○辛巳撫遠大將軍都統大學士公圖海奏逆賊併力來犯
四川敘州諸處臣請親率兵赴援 上諭大將軍公圖海既調副
都統翁愛率所部官兵自成都往援敘州總督哈占總兵官高孟

又各率官兵赴敘圖海其仍駐漢中防守秦蜀○諭翰林院日講官敷陳經史日侍顧問贊襄典學職務繁多宜廣其員以彰右文之治見在滿官足用漢官尙宜增添著卽開列應用各員職名具奏○諭都察院祭祀以承上下神祇理宜敬慎近見陪祭各官迹涉慢易班行不整笑語自如殊失執事有恪之道爾衙門職在察劾未見指名參奏所司何事其嚴飭之○諭吏部都察院國家設官分職各有專司必勤勵辦事乃克勝任近見各衙門官員有虛糜俸祿懶惰不上衙門者有老疾孱弱不能任事者應分別勤惰以示勸懲堂上官員爾等開列具奏所屬官員會同各該堂官分別具奏○諭三法司帝王以德化民以刑弼教莫不敬慎庶獄刑期無刑故讞決之司所關最重必聽斷明允擬議持平乃能使民無冤抑可幾刑措之風近覽法司章奏議決重犯甚多愚民無知

身陷法網或由教化未孚或爲飢寒所迫以致習俗日偷暨不畏
法每念及此深爲憫惻在外督撫臬司及問刑各官審理重案有
律例未諳定擬失當草率完結者有膠執成見改竄供招深文羅
織者有偏私索詐受屬徇情顛倒是非者有一於此民枉何以得
伸以後著嚴加申飭內外大小問刑各衙門洗心滌慮持廉秉公
務期原情準法協於至當不得故縱市恩亦不得苛刻失入痛改
積習加意祥刑以副朕尙德好生欽恤民命至意○癸未以劉汝
漢爲左副都御史由大理寺卿遷○贈殉難撫蠻滅寇將軍太子太保廣
西巡撫傅宏烈太子太師子祭葬加祭一次諡忠毅廕一子入監
讀書○贈陣亡遊擊陳瑤都司蕭萬奇守備高有功馮俊等官有
差

二月乙酉朔吏部都察院遵諭開列各衙門堂官具題得旨禮部

尚書塞色黑戶部左侍郎田六善右侍郎朱裝俱著原品休致○
己丑直隸巡撫于成龍來京陛見 上召至懋勤殿問曰爾爲今
時清官第一殊屬難得聞爾昔黃州土寇嘯聚爾往招之卽時投
順解散何以致之于成龍奏曰此皆藉 皇上威德臣有何能
上因問屬吏亦有清廉者否于成龍以知縣謝錫袞同知何如玉
羅京對 上曰爾前所參知縣趙履謙甚當于成龍奏曰趙履謙
過而不改臣不得已而參之 上曰爲政之道當知大體小聰小
察不足爲多且人貴始終一節爾其勉之○庚寅理藩院左侍郎
達哈塔以病乞休允之○兵部題恢復海壇及廈門金門地方係
提督萬正色密遣人至僞總督朱天貴處豫定投誠然後率兵進
取以致各島敗遁恢復空地並無殺賊攻克之處應俟提督萬正
色巡撫吳興祚明白回奏之日再議得旨進剿海賊一案原係吳

興祚萬正色會同定議不俟荷蘭國船隻卽奮勇前往志靖海氛
萬正色領水師先行出洋吳興祚率陸兵互爲聲援驅除海逆克
奏膚功爾部乃稱萬正色與朱天貴密約投誠任意妄奏以爲濫
冒軍功殊屬不合著遵前旨卽行議敘○辛卯福建總督姚啟聖
巡撫吳興祚奏請開邊界俾沿海人民復業得旨廈門金門諸處
已設官兵防守應如所題照舊展界如有奸民借此通賊者仍令
嚴行察緝○蕩寇將軍貝子準達奏正月初二初三兩日我師水
陸進剿大敗賊眾於牌華洞等處斬獲無算復長壽墊江等縣得
旨嘉獎下部議敘○癸巳諭戶部直省清察隱占田畝州縣有司
或利其升敘虛報田糧攤派民間致滋苦累亦未可定爾部可檄
行直省督撫著嚴行察覈以除其弊○甲午 皇子允禩生○
上以逆賊尙之信在廣東令其部人私充鹽商據津口立總店逆

賊耿精忠在福建橫征鹽課擅設報船苛派夫驛勒索銀米久爲民害命該部檄各督撫悉革除之又逆賊吳三桂在雲南曾以沐氏莊田賜給爲藩莊其藩下官兵侵占民田擅爲己利命戶部檄該督撫事平之日察出給還小民○以格爾古德爲內閣學士由詹事○九卿議覆奉差盛京查議鹽政戶部侍郎達都奏盛京地方係招徠安插之民其烏喇以內居住之人並新滿洲邊外蒙古等盡屬窮苦自康熙十八年召募商人呂進寅等領引行鹽徵課無幾而鹽價騰貴將及二倍窮民難以資生請停止銷引民人有情願煎鹽發賣者聽其自行貿易不許豪強霸占敕奉天將軍並戶部侍郎查緝嚴禁從之○乙未重修 奉先殿成○丙申諭學士庠勒納等直隸巡撫于成龍自起家外吏卽以廉明著聞歷升巡撫益勵清操自始至終迄無改轍凡在親戚交遊相請託者概行

峻拒所屬人員並戚友間有餽遺一介不取朕甚嘉之知其愿官廉潔家計涼薄茲特賜內帑白金一千兩朕親乘良馬一匹于成龍旣膺寵賚想當益加砥礪朕又親製詩一章嘉其廉能當更賜之○戶部題故平南王尚可喜子尙之隆請給其父在日所賜海州房地得旨平南王忠誠勞勩堅守臣節其房地遣司官一員速往撥給○丁酉 上御經筵○遣左副都御史科爾坤等前往陝西察審甯夏道柏成棟揭甘肅巡撫巴錫貪賄一案諭曰屬官訐告上司原無此例爾等前往務期虛公詳審若巴錫等負朕擢用果有貪穢之迹可嚴加議罪若柏成棟等自知有罪懼禍誣告其情可惡應從重定罪以聞○四川陝西總督哈占奏川北總兵官高孟等至東鄉縣僞總兵李正國帶賊四千有餘盤踞縣城我兵分路夾剿奪門而入殺賊千六百餘復縣城得旨嘉獎下部議敘

○戊戌廣西巡撫郝浴陛辭 上諭曰爲外官者以愛養百姓懲

貪獎廉爲要不必以苛察爲明務使德勝於才始爲可貴若專徇

情面不顧公事則悖理甚矣又廣西乃出米之地爾宜多方設法

廣儲糧米以應軍需○增欽天監滿監副一○己亥調郭四海爲

禮部尚書

由兵部調

○以李天馥爲戶部左侍郎

由內閣學士遷

李仙根爲戶

部右侍郎

由左副都御史遷

轉阿喇尼爲理藩院左侍郎以明愛爲理藩

院右侍郎

由大理寺卿遷

○辛丑四川陝西總督哈占奏總兵官高孟進

勦逆賊彭時亨於月城寨大敗賊眾擒斬無算下部議敘○壬寅

上如鞏華城○鎮安將軍都統噶爾漢奏彝陵總兵官嚴宏招

撫僞總兵趙克禮復施州衛下部議敘○癸卯 仁孝皇后 孝

昭皇后梓宮啟行 上親臨送○山西巡撫穆爾賽奏請發帑銀

二十萬賑濟饑民戶部議給其半 上曰聞太原大同平等處百姓

甚饑朕心甚爲惻惻亟宜賑濟俾各得所著照該撫所請發銀二十萬兩遣郎中明額禮等速往分行賑給○甲辰征南大將軍都統賴塔奏僞將軍何繼祖等擁眾萬餘距安籠所三十里堅據石門坎隘口拒敵臣等至西隆州先令都統勒貝希福馬緝護軍統領額赫納等率前隊官兵進剿臣與副都統洪世祿赫勒布總督金光祖分兵二隊繼其後本年正月初二日大敗賊眾斬殺甚多奪石門坎隘口復安籠所城僞總兵陳義魁率眾降得旨嘉獎下部議敘○丁未敘克海壇廈門金門功給福建巡撫吳興祚拜他喇布勒哈番又一拖沙喇哈番水師提督太子少保左都督萬正色拜他喇布勒哈番餘升敘有差○己酉 上謁 孝陵○庚戌

仁孝皇后

孝昭皇后梓宮至

陵奉安於享殿○辛亥

上

率王大臣祭

孝陵

○貴州巡撫楊雍建奏貴陽省會尙有未毀

民居宜令流散人民復其本業量減徭役俾得補葺室廬至貴陽南北大路居民皆新經招集亦應量減差徭其供應夫役私派並請禁止得旨該撫速行設策招集流民還業務令得所除供應大兵諸正役外有以私事借端多索人夫擾民者卽指名劾奏兼檄在黔將軍提鎮令嚴加禁緝○征南將軍都統穆占等奏僞大將軍高啟隆僞將軍夏國相王會王永清張足法楊應選儂朋等擁眾二萬餘人踞平遠西南山上臣與提督趙賴於正月二十二日進擊連敗之高啟隆等遁王會率其兵詣軍前降復平遠府得旨嘉獎下部議敘

三月甲寅朔宣威將軍鄂克濟哈等以建昌官兵棗城突出自劾不能救援乞嚴加處分上諭將軍鄂克濟哈久駐成都旣不能退敘州諸處來犯之賊復不馳援建昌以致失陷著解將軍任還

漢中同大將軍公圖海守漢中諸處以都統覺羅紀哈里爲宣威將軍統其所部官兵馳赴將軍總督趙良棟軍前會商剿賊○丙辰以軍興停貴州本年鄉試○定遠平寇大將軍貝子章泰奏臣等統兵於二月初五日至安南衛僞將軍線絨等率眾萬餘據江西坡臣令總兵官白成功等進擊抵沙子哨賊列陣驅象下山拒戰自午至酉我軍分三隊奮擊斬獲無算賊帥夜遁初十日遣副都統龔圖署副都統達漢泰等自臘茄坡追賊再戰復敗之復新興所普安州二城得旨嘉獎下部議敘○建威將軍佛尼勒奏副將李常輔遊擊周應鳳等於二月十九日復五龍縣城得旨嘉獎下部議敘○辛酉葬 仁孝皇后 孝昭皇后於 昌瑞山陵上回鑾○壬戌建威將軍佛尼勒奏僞將軍胡國柱等率賊二萬餘犯賓壩大溪口諸處臣率兵進擊大破之乘勝復馬湖府得旨

嘉獎下部議敘○癸亥先是命鎮安將軍噶爾漢同總兵官王用子進取遵義至是江西總督董衛國山西提督周卜世等復遵義府殺賊甚眾僞將軍馬寶棄城走復犯瀘州敘州諸處上諭噶爾漢王用子赴敘州剿之滅賊之後卽駐敘州鎮守○甲子征南大將軍都統賴塔奏賊將何繼祖等自石門坎敗遁至新城所會僞將軍詹養等率眾二萬人據黃草壩驅象迎敵臣於二月初二日分布官兵自卯戰至未賊大敗奪其營二十二生擒僞將軍詹養王有功及賊眾千餘獲象馬無算得旨賴塔自閩廣深入雲南獨先諸路大敗逆賊調度有方將士奮勇殊屬可嘉有功人員俱著從優議敘○征南將軍都統穆占等奏二月初八日遣副都統莽奕祿遊擊王成功等領兵四千追剿賊將張足法拒敵我兵連奪三山賊敗走高家橋再戰又奪其橋陣斬千餘墜崖死者無算

下部議敘又奏二月十八日復黔西大定府城擒僞巡撫張維堅等斬之水西土司安勝祖等效順助餉率其屬阿五等協力勦賊得旨嘉獎下部議敘○乙丑 上還京師○丙寅甘肅巡撫巴錫奏慶陽所屬地方有賊渠耿飛僭稱王設僞總兵副將等官 上命大將軍公圖海將軍侯張勇提督孫思克等卽速遣官兵赴勦○予福建殉難知府張瑞午高天爵同知高舉官廕武舉胡守謙卹廕○己巳征南大將軍都統賴塔奏大兵自黃草壩前進二月十二日抵曲靖府僞總兵尹士元僞道員劉世忠率各僞官投誠臣卽於是日遣兵進取交水城斷賊中路據守中路僞將軍線絨等皆遁走十五日都統希福馬緝等自曲靖府起行復馬龍州易龍所十六日復楊林城聞賊於渾水塘嵩明州等處立營遣夸蘭大碩塔等先勦嵩明州賊奪門入城賊皆遁走追殺甚多生擒僞

遊擊一人守備二人賊兵百餘是夜渾水營屯賊亦遁得旨嘉獎下部議敘○定遠平寇大將軍貝子章泰征南大將軍都統賴塔綏遠將軍湖廣總督蔡毓榮等奏臣等統兵先後至雲南省城營於歸化寺二月二十一日賊吳世璠遣僞將軍胡國柄等率馬步兵萬餘人出城列象陣拒戰臣等率滿漢兵分隊進擊自卯至酉大敗賊眾追至城門陣斬僞將軍胡國柄劉起鳳及僞總兵九員生擒六百餘人得旨嘉獎下部議敘○庚午諭倉場侍郎等近聞各倉發米多雜塵土有賄賂者給好米經管之人種種作弊上下串通侵欺盜取者甚多此米係人生命朕一經體察務將始末澈清爾等應知此等情弊若不加嚴察永行杜絕是知而自取戮矣○以張玉書爲內閣學士由翰林院侍講學士遷○壬申以折爾肯爲兵部尚書由左都御史遷○癸酉 上奉 太皇太后幸湯泉○諭內大臣等

今當田禾發生之候駐紮車馬應擇荒野之地以避田禾可令戶部司官隨後稽察犯者嚴加議處回鑾時仍卽從原路行朕將親察之○調達都爲吏部左侍郎由戶部調○先是諭兵部佛尼勒報瀘州江岸屯賊敗走今大將軍貝子章泰賴塔等兵已抵雲南省城大敗賊眾其城旦夕可下度敘州賊將胡國柱等聞之必將逃遁佛尼勒趙良棟等可卽躡追剿滅至是賴塔等奏大兵已徧雲南省城下掘壕圍之吳世璠嬰城死守又陰調在蜀賊將馬寶胡國柱夏國相等歸援將軍佛尼勒等復奏敘州賊將胡國柱等悉遁上諭逆賊胡國柱等退援雲南事關重大將軍佛尼勒趙良棟等於文到之日卽各統官兵速行躡擊勿令得援雲南將軍噶爾漢紀哈里等到日亦與佛尼勒等協同追剿如有遲延觀望者治以失機之罪○御史常錫布奏貝勒以下降封至輔國公者請停

其降封將一子世襲公爵從之○乙亥吏部尙書吳達禮以病乞
休允之○丙子諭大學士等國家事務關係重大必當敬慎詳審
今自京所奏政事三日彙送一次朕恐一時有不及檢爾其詳閱
學士亦公同理事之官如有意見亦應陳說毋謂大學士閱畢卽
緘默不言舊例批紅本發出之事內有不合尙令啟奏今雖已發

本章爾等務加公同詳閱○戊寅以宋文運爲左副都御史

由順天府

遷尹○庚辰 上奉 太皇太后至湯泉○辛巳 上謁 孝陵

夏四月甲申朔建威將軍佛尼勒奏固原總兵官王用予復納溪
江安仁懷合江僞將軍何德成等率所屬投誠得旨嘉獎下部議
敘○丁亥裁江南安徽驛傳道江甯船政同知○定遠平寇大將
軍貝子章泰奏僞將軍韓天福等擒防守武定僞總兵王來吉何
興祚獻武定府城投誠下部議敘○壬辰建威將軍佛尼勒奏三

月十五日僞將軍宋國輔陸道清等率僞弁兵投誠獻永甯城下部議敘○丙申湖廣提督徐治都奏逆賊譚宏之子譚天祕勢窮力蹙遁入山麓臣率官進剿因轉餉維艱臣已留兵扼守要地並相機招撫於三月初十日自萬縣還駐夔州 上諭巡撫王新命

郎中范承勳等乘川峽未漲速運糧米用濟軍需苟有稽延俱以貽誤軍機治罪○殉難雲南貴州總督甘文焜檄回京師遣大臣

侍衛奠茶酒加贈兵部尙書予祭葬諡忠果廕一子入監讀書○

辛丑以劉如漢爲江西巡撫

由左副都御史遷

○壬寅削原任山西巡撫

圖克善兵部尙書銜以捏報平陽府蒲縣開墾地畝故也○戊申

命征南將軍都統穆占留鎮貴州○己酉定遠平寇大將軍貝子

章泰等奏臣等率大兵圍雲南省城宣布 皇上好生之仁遣使

招撫諸路今有大理府僞定遠大將軍東平公張國柱臨安僞總

兵徐衷明李三柳羅文獻永順鎮僞總兵郭壯興范應泰姚安府
僞親軍車騎後將軍劉漢章僞總兵謝文明自蜀遁回僞親軍鐵
騎左將軍楊洪德及僞將軍趙玉楊開運高啟隆劉魁白起昇儂
朋邵文魁劉培吾僞總兵高攀喜楊斌等各率所屬僞弁兵相繼
降○壬子 上奉 太皇太后回鑾○轉覺羅沙賴爲戶部左侍

郎以科爾坤爲戶部右侍郎

由左副都御史遷

五月癸丑朔山西提督周卜世奏遵義賊兵肆亂臣遣總兵官李
師膺遊擊張所元等率兵往剿有眞安州僞知州金仕俊仁懷縣
僞知縣吳逢聖投誠遂復眞安州仁懷綏陽桐梓三縣得旨嘉獎
下部議敘○陝西巡撫鄂愷奏慶陽土寇耿飛投誠○河道總督
靳輔奏臣前請大修黃河限三年水歸故道今限滿而水猶未歸
一應大工細冊尙未清造請下部議處得旨靳輔著革職令戴罪

督修○乙卯 上奉 太皇太后還京師○己未諭理藩院蘇尼

特等旗被災今雖賑以銀米止可供一歲之用又聞別旗亦皆罹

災甚是餓饉儻秋草不肥何以爲生此事重大應豫爲久遠生全

之計爾等速遣司官前往相閱情形以聞○庚申調介山爲吏部

尙書

由刑部調

以帥顏保爲工部尙書

由漕運總督遷

○以石琳爲浙江布政

使

由河南按察使遷

○贈陣亡副將李國柱署都督僉事參將李心廣官

予祭葬○辛酉以余國柱爲左副都御史

由左僉都御史遷

○江西巡撫

劉如漢丁父憂准回籍守制○壬戌諭戶部比年以來宣府大同

疊罹饑饉而邊外蒙古亦復凶荒故發宣大二府存貯米石盡用

賑濟朕思邊境糧儲所關最重古稱三年九年之蓄蓋合侯甸藩

畿通爲之計豈僅謂公廩之充盈已也養人足食道貴變通可發

京倉米二十萬石運往宣大備用其運送米石用就近地方驛站

車夫不至糜費爾部派才能官一員前往會同該撫確議以聞○
癸亥以薩穆哈爲左都御史

由吏部左侍郎遷

○甲子諭戶部宣府太原

大同等處近罹災傷人民困苦所徵房號銀兩著悉與除免○隨

內大臣班尙之孝奏請迎其父尙可喜喪上曰尙可喜當通城

皆叛時矢志不移臨歿猶被服太宗皇帝所賜朝衣言雖死必

葬於海州儻有知覺必效力於先帝其忠誠之心始終無二今

尙之孝前往可令其將還京之日豫行啟奏遣官往德州前後迎

其骸骨○乙丑諭大學士等科道官職司耳目行取知縣內如有

曾經從賊並會受僞職及身在賊中之人名義已壞科道不當選

用爾等識之○以蘇拜爲左副都御史

由內閣侍讀學士遷

○丙寅以李士

楨爲江西巡撫

原任浙江布政使

郎廷樞爲廣東按察使

由陝西平慶道遷

○廣

東巡撫金僑奏海賊楊二等犯瓊州據海口所城又陷澄邁定安

二縣總兵官蔡璋等於三月十五日督舟師渡瓊賊分兵迎敵我兵奮勇夾擊於十六日克復縣所三城楊二等勢窮逃竄擒斬偽總督周勝僞總兵陳曾等焚毀賊船一百餘隻見獲三十餘隻得旨嘉獎下部議敘○給雲南殉難筆帖式亞圖華珊世職○庚午廣西提督哲爾肯奏逆賊黃明馬承烈等於三月十八日走湖廣靖州或赴楚界投誠或入猺峒負固俱未可定 上命巡撫韓世

琦總兵官和山等就近速行勦撫務盡根株○兵部題殉難雲南

巡撫朱國治喪櫬家屬請令大將軍貝子章泰等察明送京得旨

吳三桂反叛以來地方官有從逆者亦間有逃歸者如朱國治仗

節不屈罵賊身死殊可嘉尙如議速行○辛未調覺羅沙賴爲吏

部左侍郎

由戶部調

○以邵甘爲漕運總督

由督捕侍郎遷

○癸酉以遲日巽

爲河南按察使

由陝西榆林道遷

○甲戌刑部題立決人犯請交六月節

停刑得旨六月節若在五月內卽以交節日停刑若六月方交六月節卽以六月初一日停刑至立秋雖在六月內必俟交過七月初一日方令行刑○乙亥以阿蘭泰爲內閣學士由光祿寺卿遷○轉科爾坤爲戶部左侍郎以額庫禮爲戶部右侍郎由內閣學士遷○丁丑召進貢土默特台吉達賴等問曰蘇尼特等旗蒙古甚饑近來如何台吉巴雅禮奏曰前者蒙古饑荒殊甚蒙 皇上軫念運米賑濟皆獲更生目今得雨青草已長馬畜漸肥不至流散矣 上曰朕以蒙古饑荒深切焦勞今聞爾奏大慰朕懷○予故吏部尙書吳達禮祭葬○戊寅諭大學士等宣府大同諸處今雖得雨田禾長盛但三月中大風壞麥不得收刈雖行賑恤猶未能蘇前撫臣奏稱饑民因得賑濟又得雨澤不至流離各圖生業以今觀之殊爲不然著將應徵康熙二十年諸項錢糧及歷年帶徵錢糧概行蠲

免戶部仍遣賢能司官往同巡撫設法賑濟務使均霑實惠又諭戶部前因大同等處地方自去歲饑荒百姓無食流離失所已經發銀二十萬兩遣使賑濟又將應徵房稅悉與豁免除務期小民家室復完不失故業今差官各處察看閭閻尙多逃亡田土仍然荒棄耕種無資衣食奚賴朕心深爲憫惻雖已將本年應徵地丁各項正賦並歷年帶徵拖欠錢糧盡行蠲免猶恐小民困苦已極無濟目前此外有何應行事宜可以速拯災黎俾得存活者爾部卽行詳議具奏以副朕軫恤百姓至意○贈四川殉難副將楊三虎都司陳先鳳守備劉應科陳田伊隨征官何成德王永世劉魁傅汝友等官○辛巳定遠平寇大將軍貝子章泰等奏大兵抵雲南會城僞將軍李發美舉首逆賊吳世璠與達賴喇嘛僞書以鶴慶麗江二府降下部議敘

六月壬午朔大學士等奏追贈諸王諡號查前明時親王諡號係用一字郡王以下護國將軍以上皆用二字 上曰以後追諡郡王滿漢文亦俱用一字○癸未調溫代爲督捕左侍郎由兵部調○丙戌差往大同賑濟戶部員外郎穆稱額蘇赫等奏請訓旨 上諭曰前爾等奏饑民因賑濟又得雨澤不致流離各安生業頃朕復遣人往視人民飢餒流亡如故雨澤猶然未降則所云賑濟尙未徧及矣前此姑置不問爾毋自護前罪朕知之最悉今往同撫臣賑濟務令饑民得遂其生及作何設法拯救著確議奏聞○戊子給事中孫蕙奏陝西遭賊蹂躪又運入川兵餉民生艱苦請將通省房號銀兩蠲免部議不准得旨秦省連歲運糧民生苦累其應徵房號銀兩著通行蠲免○定遠平寇大將軍貝子章泰等奏將軍穆占率官兵還黔但今楚雄府有僞將軍陳光祿等復叛臣等

擬令都統希福等率兵往剿如又量撥官兵付穆占率回黔中則圍城兵力不支况諸路賊勢悉向雲南請就近令常德滿兵進貴州遣貴州薩克察巴圖魯等兵赴雲南則攻圍調遣似有裨益得旨平定滇中最爲要計將軍穆占不必遣還貴州令署前鋒統領薩克察巴圖魯率所部每佐領兵三人速赴雲南常德署副都統諾敏率所部兵速往貴州與總督董衛國提督趙賴周卜世等固守貴州荊州副都統莫達率所部每佐領兵三人赴常德鎮守○福建總督姚啟聖奏逆賊鄭錦已於正月二十七日死其長子爲眾所殺僞侍衛馮錫范立鄭錦次子克塽克塽卽馮錫范壻也得旨鄭錦旣伏冥誅賊中必乖離擾亂宜乘機規定澎湖台灣總督姚啟聖巡撫吳興祚提督諾邁萬正色等其與將軍喇哈達侍郎吳努春同心合志將綠旗舟師分領前進務期剿撫並用底定海

疆毋誤事機○辛卯廣東巡撫金僞奏平南藩下都統王國棟職居藩屬心在朝廷每恐尙之信恣肆橫行與臣密商參奏逆藩就繫禍患削平詎逆黨李天植誘脅不從反將王國棟攢殺支解報國孤忠臨難不屈允宜賜卹以慰忠魂得旨王國棟矢志忠貞臨難不屈乃被逆害深爲可憫作何恩卹著議奏尋給王國棟拜他喇布勒哈番又一拖沙喇哈番世職予祭葬諡恪愍○壬辰以禧佛爲兵部右侍郎由內閣學士遷○以王繼文爲雲南巡撫田啟光爲雲南布政使由郎中遷○癸巳免雲南新復地方本年夏稅○甲午予故工部尙書陳鼐永祭葬諡文和○丙申諭禮部奉聖夫人朴氏保育先皇恭勤素著護朕沖幼淑惠彌昭提抱之殷靡間於夙夜恩勤之篤久歷夫歲時朕眷念前勞已錫封典茲聞奄逝軫悼良深應得恩卹宜從優厚爾部卽詳察定例以聞尋禮部議照公夫

人例給與祭葬得旨加祭一次餘如議○工部議覆河道總督靳

輔奏請於徐州長樊大壩之後勘築月隄長一千六百八十九丈

從之○乙巳以席柱爲內閣學士

由內閣侍讀學士遷

○丙午吏部議覆御

史房廷禎奏捐納歲貢終非正途不應考選科道應如所請又督

撫子弟應照在京三品京堂子弟例亦不與考選應不准行得旨

漢軍漢人捐納歲貢俱不准作正途考選京官三品以上子弟既

不與考選總督巡撫子弟亦不准考選○除偏沅平溪清浪偏橋

鎮遠四衛房號稅○辛亥諭大學士等行取官員吏部已經引見

其各部主事等漢官朕尙未知其人科道爲耳目之司選擇不可

不慎爾等卽傳諭九卿詹事科道令各舉所知將居官潔清辦事

才能者從公保舉不可以同年同鄉親黨徇情私保卽總督巡撫

所舉有不當亦著指陳勿隱